

«L'uman chatta sia fortuna en il contact social»

Discurs cun Jon Erni da «mia Engiadina» – en temps da la crisa da corona

DA DAVID TRUTTMANN/FMR

■ Dapi tschintg onns datti «mia Engiadina», in'istituiziun che vul dar impuls en dumondas da la digitalisaziun. A la testa stat Jon Erni da Scuol. En quests dis da la crisa da corona discorra tut da homeschooling e conferenzas da video. In discurs cun Jon Erni davart far musica via video, l'agen equilibrer, il rumantsch e «sia Engiadina» en 50 onns.

FMR: Dumonda tut banala, però impurtanta en quests dis – tut frisch e saun?

Jon Erni: Schi, tut la famiglia è frisch e saun, er en il ravugl pli lartg n'è nagina persuna pertutgada dal virus, per fortuna.

Vus essas er in musicist passiuà, faschais regularmain musica en il ravugl da la famiglia. Co è quai ussa, faschais Vus quests dis era musica via conferenza da video?

(ri) Nus faschain schon musica, però betg via conferenza da video. Jau hai era l'impressiun che quai na funcziunia betg propi bain via video da sunar ensemen cun in «delay». Da sunar live e da cumpagina è bain blier pli bel.

Ensasez pudess Jon Erni, expert per dumondas digitalas, esser cuntent cun la crisa da corona. Tut che discorra da homeoffice, da conferenzas da video, da plattafurmas da coworking etc.

Jau ma fatsch gronds quitads

Na, la crisa na fa betg grond plaschair! Jau ma fatsch gronds quitads – per la glieud pertutgada, per la societad, per l'economia e per il sistem da sanadad. Però gea, la digitalisaziun survegn en questa crisa in'otra impurtanza. Ed ella po porscher in agid co ir enturn cun la situaziun. Nus essan cuntents dad avair pudì porscher – cun «mia Engiadina» – gia avant la crisa in u l'auter instrument.


Crajas Vus che questa crisa accelerechia il svilup digital – u pudess ella er avair l'effect cuntrari a lunga vista, ch'il svilup vegnia frenà?

I vegnan clermain visibels ils avantatgs, p. ex. cun il homeschooling. E la societad ha quests dis era l'ocasiun da reflectar e da far dumondas sur da ses cumportament. Fai p. ex. propi basegn da sglular per l'entir mund enturn a conferenzas e sesidas, empè da far quai via video? Forsa pon ils instruments digital dar qua respostas co ans «barattar» en avegnir, ed els pudessan era gidar ad augmentar noss'effizienz. Però insatge è impurtant: Be sur ils meds digital – quai na va betg!

Na pudess l'idea dad in mund global, connectà e svelta betg avair survegnì ina «botta blava» cun questa crisa?

Gea, quai sun jau persvas. Nus essan propi en in mument da reflexiun nua che nus ans stuain far dumondas essenzialas: Co midar noss agir e pensar? Ed en quel connex crai jau ch'il local e regiunal gudognan impurtanza. Stuain nus propi ir e prender tut dal lontan?

E Vus crajas che la societad chattia las dretgas respostas?



«Bler vegnin nus a stuair reponderar da nov» – Jon Erni.

FOTOS M. WENDT

Jau sun persvas da la forza positiva e creativa da l'umanità. Ils ultims onns avain nus adina cret dad esser maisters da tut las situaziuns, dad avair sut controlla tut. E nus essan adina stads abels da schliar ils problems en tuttas modas e manieras pussaivlas. Ma uss essan nus confruntads cun ina nova problematica e stuain emprender co ir enturn cun quai. Per exempel: Co organisain nus en avegnir mega-events? E co viagiam nus cun tanta glieud en in aviu? Bler vegnin nus a stuair reponderar da nov.

Co lavura ensasez Jon Erni dapi ils 16 da mars, dapi ch'il Cussegl federal ha decretà il stadi extraordinari?

Jau lavur pli u main mo davent da noss'abitaziun. Gia avant lavurava jau blier «remote», jau midava però savens ils lieus da lavur, era per avair contact cun altra glieud. Però igl ha schon midà ferm: Il mintgadi è pli quiet, jau poss lavurar vi da pendenzas, il puls è pli bass, nus avain temp da reponderar in pèr chaussas, ed jau hai passentà blier temp cun mia famiglia. I dat uschia bunas e main bunas varts.

Voss project «mia Engiadina» ha adina propagà l'Engiadina sco «third place», sco lieu che cumbina lavur e temp liber. Il problem actual da la crisa è però ch'il «third place» n'è gnanc

pussaivel perquai che blera glieud da la Bassa sto restar giu la Bassa?

Ma – sch'ins guarda las cifras, alura datti dapli personas che dovran il «third place» che quai ch'ins pensa. Jau sai era da familias che s'han separadas. V.d. ina persuna resta giu la Bassa e l'otra è en Engiadina, en la dimora da vacanzas. Da star ensemen l'entir di en famiglia, lavur, homeschooling e chasada, quai po vegnir stretg. «mia Engiadina» ha era survegnì bieras dumondas per duvrar il Hub da coworking a Scuol. Ma quel è serrà causa las prescripziuns.

Però gist en quests dis extremists sa musan er ils cunfins dals instruments digitals, u betg?

Gea, il contact persunal. Quel è decisiv. Era cun «mia Engiadina» è adina stada l'idea da manar ensemen la glieud. Star vi dad ina maisa e discutir ensemen, quai sto puspè esser pussaivel. Nus umans na vegnissan uschiglio betg cuntents. E nus avain adina – en emprima lingua – vuli manar ensemen la glieud. In auter punct impurtant che vegn ussa visibel en questa crisa: Igl è impurtant dad avair bunas lingias da la rait d'internet.

In da Voss projects è era stada «mia-Scoula», ina cussegliaziun ed in con-



«Nus ans engaschain vinavant cun tutt'energia» – Jon Erni en discurs cun dus co-investurs dal InnHub a La Punt-Chamues-ch, Beat Curti (a san.) e Caspar Coppetti.

cept per infrastruttura ed applicaziuns da comunicaziun e collavuraziun en las scolas popularas da l'Engiadina e la Val Müstair. Èn ussa las scolas stadas preparadas bain sin il «lockdown»?

Jau hai grond plaschair da quel project fitg complex: bunas lingias, wlan, applicaziuns, programs ed atgnas adressas da mail per mintga scolar. La persvasiun da far quai n'era betg adina qua. Però uss avain nus per fortuna fatg la lavur. Nus survegnin ussa blers resuns positivs da magisters e geniturs. Quai dat in stimpel che mussa co la scola da l'avegnir pudess esser.

Ir mintgadi en chasa da scola?

Co lura concret?

Forsa pudain nus dumandar: Sto in uffant ir mintgadi en chasa da scola? Pudess el mintgant era lavurar davent da chasa u dad in auter lieu? Co pudessan magisters communitar cun ils uffants? Mo sco exempel: Mia figlia sperescha ch'i giaja anc in tempet cun il homeschooling perquai ch'ella po ussa lavurar cun ses agen tempo. Ed er auters pajais – p. ex. la regiun da Västerbotten en Svezia – enconuschan gia systems da homeschooling causa las lungas distanzas per ir a scola.

Nua stat atgnamain – sch'ins guarda la situaziun actuala cun il coronavirus – il Grischun concernent ses grad da digitalisaziun?

Il Grischun ha fatg gronds pass ils ultims onns. Avant 3–4 onns devi pauc'iniziativa per s'engaschar. Quai ha midà, grazia a diversas iniciativas privatas – ma era a nivel politic. I dat in moviment cun persistenza. Er a nivel finanziar impunda uss il chantun 70 milliuns francs per il bindel ultra-lad ed el vul metter a disposiziun 40 milliuns per la promoziun digitala, pachetada en ina lescha ch'il Cussegl grond ha da tractar. Per turnar tar la dumonda: Jau crai ch'il chantun Grischun saja concernent las mesiras da promoziun cun il grad da digitalisaziun en l'emprim quart dals chantuns svizzers.

Vus avais menziunà ils 40 milliuns francs ch'il chantun metta a disposiziun per la transformaziun digitala. 40 milliuns para blier, ma ensasez è quai mo circa in mez milliun per mintga vischmanca. Èsi ussa blier u pauc?

Impurtant èsi dad impunder quels raps cun effect multiplicatoric. V.d. i va per sustegnair a moda subsidiara projects ed iniziativa privatas u dad instituiziuns. I va per dar in stimpel – e s'enter stuess tut funcziunar tenor aspects economics. Il chantun na sto betg esser sez quel che tira la bartga.

E co statti cun il rumantsch? Nagina tema che la lingua pudess vegnir sut las rodas en in mund digital e surtut englais?

Quai è propi ina tematica che ma dat da pensar. Ensasez stuessi dar era per rumantsch instruments che rendessan pli simpel da far p. ex. translaziuns. Il problem è però adina il medem: Per elavurar tals instruments dovri in bun volumen da datas, cun datas unitaras e duvrablas. Ma igl n'è betg simpel dad organisar quellas datas. Jau sun qua però er en contact cun la Lia Rumantscha.

Ed jau sun persvas, sch'experts da la lingua e tals da la tecnologia sesan vi dad ina maisa, alura stoi dar ina soluziun.

In auter grond project da «mia Engiadina» è il «InnHub», in project d'intercenter d'innovaziun a La Punt-Chamues-ch. Quel stuess vegnir avert, sche tut va bain, l'onn 2022. Tut sin buna via, malgrà corona?

En quests temps difficils èsi impurtant dad avair ideas per l'avegnir. Gist uss èsi era da sviluppar ideas distatgadas dal turissem classic. Jau hai schon fatg ponderaziuns, sche la crisa pudess avair in effect sin il project dal «InnHub». Però da la vart dals auters investurs èn vegnids signals positivs. Uschia che nus ans engaschain vinavant cun tutt'energia. Però gea, quant ferm ch'il donn economic vegn ad esser, quai è grev da savair ussa.

Dapi tschintg onns datti ussa «mia Engiadina». Avant var traits onns avais Vus bandunà la gronda firma da Microsoft, en ina buna posiziun. Mai s'enriclà d'avair fatg quel pass?

Jau hai ussa in meglier equilibrer

Na, mai m'enriclà. Igl è stà per mai persunalmain in pass impurtant. Jau hai uss in meglier equilibrer, jau sun vegnì pli quiet e cuntent. Jau hai damain squitsch, na sun betg dependent dad auters e poss m'engaschar per ina chausa che stuess avair in effect en diesch u quindesch onns. Quai dat satisfacziun. E cun Microsoft poss jau anc adina col-lavurar per singuls projects.

Per finir: En scola avevan nus adina da scriver cumponiments davart la vita en 50 onns. Co guarda ora l'Engiadina da Jon Erni en 50 onns?

(ri) Jau hai perfin gia scrit ina giada in tal text – per il cudesch da las visiuns dal cusseglier guvernativ Christian Rathgeb. Mia vista per il futur: L'uman chatta sia fortuna mo en contacts socials, en l'interacziun cun autras personas ed en la cuminanza. Esser cuntent en in mund digital isolà, quai na va betg. Jau vulesch che l'Engiadina fiss in lieu d'inspiraziun per esser creativ e productiv – ensemen cun auters, en contact vicendaivel. La tecnica na po betg esser qua per stgatschar l'uman, mabain per sa metter en il servetsch da quel. Ils basegns da l'uman stattan adina en il center. E perquai empruvain nus da far lavur da pionier, chattond novas soluziuns co viver en nossas vischnancas u co dar vita p. ex. a scolas vidas. Però l'emprim da tut stuain nus tuts ensemen vegnir «maister» cun quest grond privel da noss dis, la pandemia. Quai ha emprima prioritad.

L'Engiadinais digital

Jon Erni (51) è creschi si a Scuol ed ha studegià electrotecnica a la Scol'auto politecnica a Turitg. S'enter differentas staziuns en interpresas da tecnologia è el stà manager dad ina partiziun da Microsoft Svizra (clients gronds e secur public). L'onn 2015 è el stà co-iniziant da «mia Engiadina» che vul dar impuls en il sector digital, cun sviluppar, promover ed offrir soluziuns digitalas surtut per la regiun d'Engiadina. Dapi l'onn 2018 sa deditgescha el plainamain a «mia Engiadina», tranter auter sco president da quella fundaziun.